



二酉園文集卷之九

沔陽陳文燭玉叔著

記

五嶽山房記

沔蓋古雲夢澤云江漢之水合流繞郭非司馬
長卿所稱罷池陂陀下屬江河者哉故境內無
山而余世家江北古城竹塢人稱山林云家按
察公移居郭內丁復中坊構書屋數楹前致奇
石者五中高而西者象太室東一阜曰觀峰西



一象蓮花峰南一象响嶮峰北一象入行之碧
玉皆大人題品吳陳方伯子兼書五嶽山房
扁焉四明豐吏部人季南海黎秘書惟敬吳興
徐按察子與賦詩歌投贈又舍人梁思伯廷評
梁彥國俱在羅浮各繪爲圖西蜀甘憲副征甫
掛冠東岱貽真形一圖四壁蒼翠泠泠有聲鳴
乎奇矣昔向長有名山之興自言富不如貧貴
不如賤思畢婚嫁便遊五嶽宗炳棲丘飲谷徵
辟不就經游勝處悉圖于室謂人曰撫琴動操

欲衆山皆響今吾廬面奇石又多海內名筆乃
大人詠歌其間庶幾宗少文所稱卧游哉若向
子平之願則不穀又何讓焉遂操筆而爲之記

日休堂記

泰和王君尚涵自童子時稱少俊王公大人引
以爲奇皆曰唐家王子安復生也弱冠舉鄉試
第一仕司華亭教漸擢大理寺寺正奉

上命恤刑雲貴多所平反未幾有左官之命憐
才者思究厥用而君病䟽以歸且以適莽蒼者

投足坎壈榜人艤舟臨流失揖又下走遐逝而
渡江海乎吾茲休矣鵬鷁之飛九萬榆枋椿菌
之生千年一夕同適于大造耳吾茲休矣陳生
曰吾觀都門日暮有側肩爭趨者鍾鳴漏盡有
衣繡夜行者君何休焉王君曰狗財死權衆庶
馮生竊病其勞也吾舊以日休名吾堂今歸矣
子爲我記之陳生曰我聞作德心逸而後休也
然稽古人之德莫先於易夫人於進退存亡之
際奈何心戰莫定也而易言之大備其象與辭
其變與占可觀而玩也行健配天安貞應地卽
天地不齊之遇一無與於吾心此非怵迫之走
并介之人所能曉者君讀易取高第卽前談說
余率有味乎其言所願假年學易永茲休也或
出或處焉往而不自得哉王君曰諾書作堂記

近淮書院記

近淮書院者總督董先生所創也先生家世楚
自黃陂徙信陽州舉嘉靖辛丑進士官都御史
云往家食時讀書鄆城北買田一區墾表若干

葺舍數椽諸峰羅列曲抱澗水北繞淮河淮河
者禹自桐栢所導也先生取正諡明道之語扁
其堂曰思道左種竹萬竿軒曰環翠曰虚心右
近長湖可舟亭曰背郭曰耕雲曰釣月曰先春
又隙地可射亭曰觀德旁多蔬畦花圃過者墾
楓樹知其中偉人云先生有子國儒知讀父書
藏經畧稿及古今諸籍會余長安道之且曰子
楚人也爲通家交盍記之嗟乎世所稱名園臺
池亭榭多頽落消歇有百世其思者皆以人而

重始先生令邯鄲余過邯鄲邯鄲人爲余言多
古循吏事得祠而祀之後巡撫延綏虜入寇先
生親冒矢石破虜於魚河時家大人官職方每
言董公者屹然長城也及讀御史時寬海禁等
疏晁賈所陳貴粟積貯此何讓焉昔公家仲舒
當漢建元元封之際奉對天人剖中時務乃相
江都徙膠東未究其用先生遭逢

聖主勲名在疆場得優游歌詠視昔人有良遇
異日者考先生望居顧瞻茲地茲地不朽哉院

外多水田先生方于耕無逸豳風思召所謀國者其歸曰明農是先生之用心與院南爲子貢性道學院西則大復何先生讀書庄皆足繫高山仰止之思者敢叙述而爲之記

劉文安像記

余讀劉文安公榮哀錄乃嗣君司農氏承恩所梓凡

朝廷賜典與海內學士所贊述備焉慨然想見其爲人後司農君出公之像而命記於燭又恍

然如對公云公諱龍字舜卿別號紫巖其勲業不可殫述余觀其

武宗時逆瑾用事士靡靡趨之公在翰林大忤瑾竟至左遷瑾誅而後復其官

世宗繼統新貴人議禮

太后欲廟謁公佐秩宗執

祖訓不可凡三上始報罷又南都武臣席寵怙侈云掌留兵悉裁以法魏國永康撫寧諸臣肅然憚公時宣大有警公條陳便宜大事咸見施

行後八里居虜騎薄城土人勸公避公曰我
不可去父母之邦耳指授方略虜稍稍夜却凡
此皆事機之變耳公應之雍裕權貴患難屹然
莫奪斯凜凜社稷臣矣乃若高文典冊關中呂
仲木比之歐陽永叔真確論云余惟像者想也
因其思而遺焉者也行業如公百世之下聞者
莫不興起况遘其遺容不有塋之儼然卽之溫
然者乎及讀公上

孝宗皇帝書

孝宗大奇之賜第一甲其言禮樂詳矣於漢叔
孫通諸葛亮薄不爲也今觀公樹立允信是先
資之言如券又何厲也昔人稱位冠羣臣聲施
後世與閔天散宜生爭烈者公其人與公其人
與

游太和山記

昔漢司馬遷謂自古帝王蓋封禪云後世功不
至矣德不洽矣言不暇給矣且三代咸起河洛
故嵩高爲中嶽而四嶽如其方

明興起南服

文皇帝賜太和爲太嶽

肅皇帝又起郢上賜曰玄嶽建顯號施尊名
大明之德濶溥原泉未有過于茲山者余感焉
作游太和記

隆慶四年庚午六月余由大理寺正奉

命出守淮安歸省家按察公道經襄陽望太和
在步武間憶大父承德公嘉靖初年登之承德
公身長玉立聲如洪鐘聞數十里游者目攝公

曰偉丈夫哉不穀兒時大父津津道焉歲丙申

三月按察公再登禱絕頂得奇夢四月八日甫
歸而不穀生小字武當人以爲異云不穀稍長
有意乎萬里之游嘗嘆曰名山在天壤間可少
吾杖履哉而太和託始矣是月六日由襄陽至
穀城明日至界山是夕大雨晨起復晴望諸峰
崗巒如沐千鳥競翼百猿接臂過遇真宮諸黃
冠走謁其鳳凰峰鴉鵲嶺廻繞奇特溪水隨之
松杉夾道以萬計謂之遇真者非其真武遇真

人得道處耶行少許過治世玄嶽坊走太子坡
謁老君殿時方不就玉虛宮宿焉登望僊樓尋
雪洞聖水池謂之玉虛者非以真武爲玉虛師
相耶東廡有張三丰道人像

文皇帝所賜真人誥就月下誦之月明如晝
露濕衣越九日由玉虛憩龍泉觀度橋們巖時
有道人多坐樹間聞談經聲又風送鐘磬不絕
暮抵紫霄宮宿焉前爲福地巖後爲煉丹巖有
七星三清諸虛謂之紫霄者非以凌霄漢騰紫

氣耶明日游禹跡池徘徊臨清萬松亭其水月
雙清又明日酌上善泉甘異諸水有垂白一道
人李者問按察公起居出向來贈詩墨猶新也
詩云已入無生境仍逢不老僊形棲翠微上神
想大初前丹鼎君初就紅塵我尚牽何時婚嫁
畢來此問真筌和歌而別重余徘徊云十二日
由紫霄經烏鴉黑虎廟過榔梅祠其地益高峻
令人心骨俱寒又入清微觀皆懸鐵索攀石欄
以躋者少頃入大門謁玄帝次太和宮宿焉十

三日乃按察公壽再拜祝焉是日大晴立天柱
絕頂星辰如斗欲墜不墜望白雲在下忽有雷
聲中起其諸峰若玉筍若中笏若天馬若伏魔
或見或隱最著者止香爐耳余遂就枕明日天
稍陰辰刻始霽見湘河如一線云讀

文皇帝御製碑求唐宋片碣無有現秦漢乎乃
宮殿之盛若連閣累憇輦道相屬云由太和至
南巖宮宿焉石上有蒲圻廖公道南沔陽董公
承叙來游題字其詩剝落不存有捨身巖飛昇

臺聖之深萬丈不能久視有龍頭焚香處余若
履平地十五日過虎耳巖中有高僧不二又呼
爲佛子巖余未及至而此僧炊飯相待矣引余
坐石榻耳語甚驩叩所從來多不答其言大都
彼教中度一切苦厄照見五蘊皆空云耳巖頂
有蓮花池水旱不乾余欲題詩巖間不二止之
曰公何色相哉大笑別去日暮過滴水巖傍有
大樹皆千年物其水中龍鱗欲作雲雨狀其樹
聲若虎嘯令人恐恐速行就五龍宮宿焉道士

出真武玉像立蓋五色玉云其山爲青羊峰爲
繫馬峰其水爲日池月池爲白龍潭爲萬虎澗
一一經目自然菴中有

文皇帝賜李素希衲衣余披卧一夕忘暑矣十
六日飯迎恩宮投淨樂宮宿焉謂之淨樂者非
以真武嘗爲是國太子耶自余山行十日經風
雨陰晴乃千澗之聲在耳萬仞之形在目烏覩
人世哉

陳子曰太和蟠踞八百里其七十二峰三十六
巖二十四澗余莫能狀也讀

文皇帝御碑謂其跨洞天之清虛凌福地之深
睿大哉王言可狀茲山乎至云大而無迹之謂
聖妙不可測之謂神卽太和融結亦元氣之流
行宇宙間耳何可名焉語曰荆山爲地雄果雄
哉余爽然自失矣

尊經閣記

道晦而後有經之名經晦而後有尊之名伏羲
至純厚作易八卦堯舜之盛尚書載之禮樂作

焉湯武之隆詩人歌之春秋推三代之德采善
惡以褒周室是謂六經聖如孔子雅言之假年
學之竊取脩之信而好古豈無意于尊經哉孟
子七篇願學孔氏而歸之反經時多異端離畔
日甚撥亂而正之于經何如也漢承秦絕學之
後除挾書之令集諸儒于白虎觀以講異同如
何田孫期之于易轅固韓嬰之于詩伏生夏侯
勝之于書高堂二戴之于禮丁恭賈逵之于春
秋多其誦詁要不詭于聖人有宋諸儒復昌明
之如天有日星地有江河云夫易長于變書長
于政詩長于風禮長于行樂長于和春秋長于
治人天地之開闢皆有教也孔子曰入其國其
教可知也乃不達于陰陽不履于和平無以肅
綱紀而辯是非則六經之教安在也卽日誦遺
言與耳食何異斯邪慝之昌而不經甚矣淮安
府學舊有藏書閣名曰尊經歲久頽廢文廟亦
圯會

今上御極下風勵學宮之

詔余白于撫臺王公捐帑金脩之渙然更新詳
在王公脩學記中博士及諸生以余時登閣上
問記于余嗟乎六經燦然矣余懼其師異道人
異論百家殊方指意不同故所談者先儒業言
之亦尊所聞云耳語曰爾學不明不如歸耕願
諸生恟懋之

招隱亭記

淮城西門外有西湖其垂楊煙水蓋勝槩云稍
三里許地脉墳起鉢池山寺僧圓智募居士許
驟結菴舍茶於上五游山人郭次甫往來東岱
時居然後隱焦山不來余招之始來遂以真形
圖一杖一衲一瓢一鋤一觚一懸焉叅知潘公
題曰隱菴後爲一亭儀制王敬美過淮訪次甫
低徊留之不能去且曰庶幾遇小山八公之徒
乎余扁曰招隱兩人促余記之嗟乎人生天地
寄耳次甫寄身於隱余所聞由光誼至高次甫
似之矣又足迹遍宇內名山大川奈何寄意於
茲亭而托之乎余言哉余誠不知其懷之所繇

西園文集 卷之八
興也書作亭記

竹在亭記

余蓋荊州人讀盛弘之記謂山中有竹大者數十圍小者四五圍下有奇石風生竹拂絕無塵穢聲如管簫聞數十里以爲寓言耳乃余家瀟湘在塢上又讀書蘇阡又爲園夏汭蓋多竹云比守淮陰郡齋有竹扁曰青玉時耳竹聲乃知盛生言不虛矣頃豫章王孫貞吉自謂其先公愛竹種之號竹隱十年幾絕一旦竹茂如昔杜甫余先生題曰竹在亭皇甫子循吳明卿周公瑕魏季朗俱有作而屬記于不佞又走使數千里外嗟乎王子猷愛竹至不問主人今公家之亭又仁孝之所寄也公雅善詩翰遍交海內賢豪日詠歌亭中取盛生言誦之亦有當于心乎若其中虛而性直也節勁而枝茂也可以比德而况後必有能誦之者奈何有于余言哉奈何有于余言哉

建杜工部浣花草亭記

浣花草堂杜工部舊居也揚文忠公記之詳矣
余入蜀游焉因嘆曰有唐至今赫赫盛哉何無
以茅爲亭者乃安陸揚公芷番禺王公原相餘
姚周公思克肥鄉張公思忠命經歷王忠創爲
之而題曰乾坤一草亭俾當年所營茅屋千載
如新也余坐其中見層軒所面卽百花潭水而
幽澄入戶足消客愁者又鷗鵝飛鳥時相上下
風月之夕則橙林翠竹作烏烏聲如垂老之別
無家之嘆忠臣義士聞者淚不可禁亭外老樹
飽歷霜雪其凌霄之狀若俯挺之之子而小之
流落景光咸在亭中假令子美有知當驚二三
公知已于百世之後矣嗟乎祿山之亂遠依嚴
武在唐上元間公有大不得已者方其茅屋爲
風所破嘆曰安得大廣廈更被天下寒真壯士
哉可以許稷契矣後世奈何以詩人之雄槩子
美哉王忠聞余太息就溪水滌硯請余記之俾
脩亭者無忘誅茅之意云

重修灤西草堂記

昔人謂杜子美夔州以後諸詩蓋最工云考先生自成都下瞿塘浮湘壘洛而寓于夔門其居三徙有灤東有東屯而灤西尤著地多平曠田可水稻先生出峽卽易其主而所手書券宋元間得而珍之後日荒圯萬曆改元夔州郭君斐訪遺址檄奉節令羅繡藻新祠事肖先生像太守能文章有記述而又請余碑焉余奉

天子璽書宣教化例得旌揚古今忠義之士徘徊祠下不覺泫然也憶先生獻賦時玄宗大奇

之命宰相試其文拜左拾遺乃高自稱道先世以來多以文顯若薄楊雄枚臯不爲者其矜誕一時有祖審言之風會祿山亂輦轂入蜀避走三川肅宗立往救房瑄至不省錄嚴武節度劔南復依焉表爲叅謀檢校工部員外郎先生久于夔及茲堂之建其時有足悲者而史稱先生挺節不污所爲詩歌善陳時事千彙萬狀兼而有之忠君憂國每飯不忘當時韓愈氏高其文章光焰至長萬丈也真知言矣語曰生無一日

歡死有萬世名先生之謂乎先生襄陽人與孟浩然友善襄陽舊有孟亭不存而峴山祠先生者亦荒今灤西更新比于同谷浣花可謂無關世教哉余爲迎送神曲使歌以祀其祠曰

昔飄零兮流寓嘆遷次兮朝暮側身來兮參差其舊路 右迎神曲

三年飽兮煙霧千載驚兮香炷尚轉蓬兮

山靈其呵護 右送神曲

牛頭山工部草堂記

潼川蓋唐梓州境而牛頭山在郭門外杜工部嘗登其上所云五載客蜀郡一年居梓州是也叅知梁尚賢憲使王元德分鎮劔南捐金度木命刺史張輝南爲草堂于山巔余試士過焉刺史乞余記之嗟乎公遭祿山之變飄零于蜀或自綿而梓或自閬而梓坎壈之狀千載流涕而誦其詩者興忠君愛國之思卽公在梓州詩如王侯與螻蟻同盡隨丘墟願聞第一義廻向心地初予瞻嘆其以詩入道猶庖丁以牛入也輪

扁以輸入也蘇氏知公乎是公詩多于蜀而刻
悟于梓公神其託茲山哉天壤俱敝可矣昔唐
陳子昂梓州人公過射洪學堂撫遺跡而弔焉
有盛事會一時此堂豈千年之詠若爲今日而
言者則牛山數椽與金華竝峙乃不穀之慨慕
于公奚啻公于伯玉哉浣花瀼西余業有記而
今又託乎片言其有私感與若謂能飽公殘膏
賸馥而揚摧之則余豈敢

禮部尚書李公祠堂記

昭代正統間富順蓋有大宗伯學士李公云公
有昭德集言家世自荆之公安范文正所稱祖
宗積德始發于吾乃繼述在後人焉至于論文
自六經外惟司馬遷哉卽欲謝朝華振夕秀無
能出藩閥矣余莊誦而心折也公沒百餘年公
曾孫水部公同家大人舉嘉靖庚戌進士余奉
命督蜀學事玄孫太史公與余善乃言曰長春
有今日自先宗伯公而公祠在南浦配公者公
李子學正公也後附以中憲水部兩公必長子

孫及仕而賢者始入焉幸公言記之余按古祭法有二曰報功曰脩先李氏祀其先亦猶行古之道也余過富順低回祠下不能去昔三川之民披髮而野祭孔子傷之巴俗崇佛教列剝徧于山谷無名家專祠者李氏有世德哉宗伯公倜儻能文章正統戊辰進士由吉士至侍讀在翰林三十年歷太常少卿至禮部尚書在南都又十年每以忠直受知列聖而忌公才者未及登相而罷諭祭有曰脩史秉筆削之公進講著啓沃之益夙夜寅清典禮罔忒蓋確論云學正公善詩弘治辛酉鄉薦其司濮州教典河南試有聲方內召而公逝矣中憲公剛毅人也嘉靖己丑進士御史時嘗論救大禮大獄諸臣仕秦以不合歸水部公長者河渠督木以能著偶論二千石僨事爲言者所持乘天變調公守趙州八月而歸趙人思而祠之三公善繼公昭穆蒸嘗無愧色矣今天子詔下學宮議祀典僉謂公品流可祀于社與滄州劉文簡公長寧周

文安公相爲鼎足顧易名尚缺典也漢章帝元和
和中巡狩至沛使人祠桓譚于家明帝永平間
詔京兆右扶風以中牢祀蕭相國令子孫侍祠
假令有司以公聞于上安知不賜謚與祠烏奕
漢代哉祠有堂一厦樓三楹左右舍各一松檜
脩竹以千計公諱本字立之號立菴學正公諱
世昌字道亨中憲公諱鳳字鳴叔水部公諱方
至字如川詳家譜中太史公綢繆軒陸將大秩
宗之業而急于脩先天下稱誦周公爲其論歌
文武達太王王季爰及公劉以尊后稷也詩曰
子子孫孫勿替引之李氏其昌乎又曰孝子不
匱永錫爾類可以風蜀矣遂不辭而爲之記

四川按察司分巡川北道題名記

余讀周禮古職方氏掌天下之圖天子春蒐夏
苗秋獮冬狩後世此令不行于方與而其權寄
之憲臣所謂陳詩觀風命市納賈以觀好惡咸
得操握及讀國家憲令蓋最重按察司云國初
御史不常遣其官邪民隱惟按察司專糾禁之

其後歲遣御史一人而按察司設分巡道其權
與御史並蜀之東西南北各分一路出入會城
省觀以時議者謂蜀山川盤紆有司簿書期會
旦夕難達而呻吟之民寃滯之獄與災沴之變
兵革之擾非憲臣坐鎮之法禁柰何不敷潰也
嘉靖壬辰柴公儒巡川以北始駐節于保寧其
衙門在城東南隅越甲辰張公時聘以地稍卑
濕就王府廢基而改創焉隆慶壬申秦公舜翰
左右增舍規模弘遠萬曆乙亥滇南王公奉

璽書而來彰軌貞度詢于掌故勒諸君子姓氏
屬不穀記其事嗟乎子產有言曰令名德之輿
也德國家之基也詩云樂只君子邦家之基有
令德也上帝臨汝無貳爾心有令名也夫宣令
德載令名而遠邇始安况蜀去轂下萬里而北
路倚劔門尤稱重地憶昔唐宋時氣節如顏真
卿文章如李義山政事如崔與之或分知諸路
或號安撫使其權不及今按察十之一二而三
先生之名赫赫天壤若與劔閣巴江同其高深

者茲豈聲音笑貌可襲取于千載之後乎王公
此舉彰往訓來意在不朽敢舉三先生聖公且
告後之秉憲者若某也賢某也否指而議之茲
石亦袞鈇哉不穀無容喙矣王公名來賢字元
德舉隆慶辛未進士詞翰風猷表著宇內與余
善

遂寧令羅公生祠記

羅公登嘉靖庚戌進士辛亥授遂寧知縣越癸
丑天子璽書徵良吏公褒然嘗舉遂民老稚無
不泣下者曰奈何去吾父母乎輒家祀而人祝
之丙辰公爲戶部主事奉命督滇賦蜀父老攀
轅入遂留境上不能行曰何幸見吾父母乎遂
于邑之北圖祠祀公隆慶癸酉公爲蜀左使辛
未撫貴陽遂民省公趾錯于道縣令樊盛新公
之祠請余文記之乙亥公撫蜀余謝曰公方在
事何可頌焉丁丑公改官留都余再過遂士民
申前請昔何武無赫赫之名而所去見思公有
重名而去思若此乃操筆記之以風有位按遂

人
都御史陳公講光祿卿黃公華二公皆長者
言公在邑清靜寧一毫髮不取于民退坐水月
閣中食枯魚衣布袍意澹如也乃片言折獄公
庭寂然人稱神明暇則興學造士種種埒于古
人余獨多公活人一事往牒無有也一日公視
堂事有報黃連舖殺人者公躍馬視之一人卧
地下喉有刀痕使人視之氣絕矣公親摸之微
有溫氣移之獄中有罪人白瑜席華公面諭曰
得活此人吾將汝釋兩人日夜視之至七日而

其人蘇一月而其人人生公詢何事被殺及姓名
寧死不言公竟釋去不知所往後遂人遇于峩
眉山中擔水濟僧自號白水道人時時向佛前
設小醮祝公無疆之壽嗚乎異矣古有秦越人
見垣一方知五臟癥結公之起死者類之昔太
史公作循吏傳楚有孫叔敖鄭有子產魯有公
儀休大都皆廉平吏耳乃繼之石奢則因父殺
人自刎死者繼之李離則過聽殺人伏劍死者
兩公重民命寧殺其身奉法循理庶幾稱良哉

公于生者安焉死者活焉馬遷而在必列公于
諸君子之林後世長民者日事敲朴爲漁奪計
如狼牧羊無完畜也視公不愧而死乎公展采
中外有奇勲及遂多善政余不論而論公好生
之德有斐君子不可諠兮公之謂也祠何可已
哉祠何可已哉公名瑤字國華別號野庭家洞
庭湖上

漕儲道題名記

隆慶六年壬申 穆皇帝軫念國計復

二祖海運舊制而臨海王公宗沐始行海運又
河道淤阻轉輸孔艱王公思變易而革也乃土
書曰煩劇不能獨運而職守不容相干分理而
專責之者漕臣是也且漕運有總兵督撫而復
有叅將近日催儻之法已密而運糧官軍苦于
羈轄其弊尤多牧羊者患人盜芻也立之監監
止而羊益瘠矣乞勅該部革武臣添設漕務叅
政一員帶銜山東駐劄淮安兼理廬鳳淮揚糧
儲 先皇帝嘉納以上海潘公允端領其職每

年春駐節瓜洲夏同總兵官督運到灣復歸于淮歲以爲常政令赫然耳目一新國家承平以來厯厯見耳語曰瑟更張而鼓無絕絃矣鑑刮磨而照無眩物矣不穀守淮竊嘆此還至而立有效者也甲戌去淮而海運罷丁丑冬膺茲簡命明年浮淮入京陛見今

皇帝賜酒飯勞焉月餘陛辭

上賜如初領

璽書以歸徘徊富穀堂問前道名碣無有也而潘公刻在瓜洲此何可少也夫藩臣分理漕事卽四百萬石一身也九州之半一心也而又值聖明革故鼎新之會余讀易卦而有感于革焉其曰巳日乃孚元亨利貞言革而當也

先帝用撫臣言更置文武善通舊制乃二三大夫賢者也歲輸旣早民力不屈易稱文明以說大亨以正革言三就又何之矣革之終有曰君子豹變小人革面居貞而吉苟不守之以貞所革隨變悔無及也 勅諭所云廉謹自持盡心綜理有貞之義哉有貞之義哉不穀日兢兢焉

世圖文集 卷之六
恐猶與牧羝者類也敢告諸君子以有孚之革亦不穀託姓名之幸與

集鳳臺記

京口三山蓋金焦北固云五游道人郭次甫隱焦山二十年余往守淮陰結招隱亭居之督學入蜀而次甫還山及督漕始訪次甫山間蕭然一室多高梧脩竹次甫就清陰壘石爲臺登臺舒嘯西望大江八千餘里長風落照明月青霞足稱賞心復構亭于臺上金陵邢學士伯羽題

曰集鳳亭甫成而余至次甫曰昔焦孝然不赴漢三詔結蝸牛廬于浮玉山白日輕舉後改爲焦山陳留蔡公邕有贊嗣有傳先生者少好道坐焦山石室中遇太極真人授以木鑽使穿盤石積四十七年石忽穿乃亦飛去西蜀李公昌齡有序吾老茲山矣願公一言記之余笑曰昔吾鄉米元章愛潤州山水之勝遂以平生所好研山石與山僧易海嶽菴居焉菴在北固山不穀何以易茲亭哉古之高士潁陽桐江其猶鳳

乎當時隱矣而千載侈談絕雲霓負蒼天鏘鏘
翩翩足增宇宙太和之氣乃知丈夫樹立潛見
不同同翔千仞哉宋玉有言藩籬之鷄難與料
高也尺澤之鯢難與量大也司馬遷曰舉世混
濁清士乃見次甫懋之矣不穀好奇之僻差比
古人乃文翰愧中郎諸君子遠其次甫奈何有
于余言哉

游峩山記

昔蘇子瞻言天下山水在蜀蜀山水在嘉州非
謂峩山哉余少讀范成大峩山記比長管子建
初惠余峩山圖欣然神往萬曆甲戌奉

命督學事冬試嘉州僉憲關中商叔後約余同
遊雪大不果乙亥再試少叅石晉王引瞻脩撰
富順李元甫使蜀三人雅善訂共游焉乃王李
奪于公期而余獨往時九月朔日也嘉守鍾玉
甫別余郭門行三十里至蘇稽渡卽長公讀書
處也行十餘里憩德山寺望三峩挿天雲氣如
赤珠如白鶴如行人鱗鱗不可名狀讀宋英宗

御制別山碑別山者開山寺僧有經行者憇聖
積寺登老寶樓覽魏鶴山峩峰真境四字寶亦
宋僧別山者流有東明沙門年九十擁錫而行
素與新都楊用脩青城余懋昭游藏二公詞翰
余爲老僧像贊而出出過解脫橋憇華巖寺讀
宋紹興碑發涅槃之蘊演勿照之明令人爽然
至楠木坪樹如寶蓋葱菁十餘里見溪下一石
類舟人云此普賢船也至大峩石上有陳圖南
福壽二字石前有流盃也余爲神水贊而去去
登歌鳳臺卽楚狂隱處也憇中峰寺玩孫思邈
藥鼎丹竈其形甚古憇牛心寺寺下爲雙龍橋
兩水分流石梁跨之蓋天成云過梁渡溪憇後
牛心寺玩唐三藏取經時所遺卓錫非人間物
國初高僧寶曇圓寂于此或言

高皇帝同時僧廣濟避居峨山後宮中聞龍躍
聲詔易前杖莫可考耳由四會亭經南戒名宗
坊投白水寺宿焉訪唐濬師彈琴處湮滅也有
鎮南沙門與之語合言師別傳年七十游南海

三十年前種樹千百今鬱鬱蔭此山矣出內江
學士趙孟靜衣契讀之謂克其心則宰衡吐握
一代人才可種也洙泗指迹千載人才可種也
余味其言書短歌寄焉越二日鎮南隨余登頂
心坡坐筍輿用布懸引而上經息心所大小深
坑有長老坪差覺平坦喬木千章千雲摩蒼交
錯糾紛古蘿蔓延下垂人云此普賢線也行至
鷲店飛岑噴吼過木皮殿上胡孫梯歛霧逢淳
咫尺莫辨過梅子坡至雷洞坪有禁人語鐵牌

恐風雷忽震山此轉折八十七盤最上娑羅坪
蓋有娑羅花云捫石穿林黯黯不見天日巖下
魄魄多千年積雪冰氣皚皚射人已入天門石
度天僊橋投光相寺宿焉老僧取水炊飯爲言
頂有池水無泉脉可給千人炊米數沸中食過
百沸則心結粉粒反不可食卧必累褥坐必執
鑪其寒慄異常云越三日沐浴禮普賢大士祈
家按察公壽舊有銅鐵錫三殿今存鐵瓦殿云
有通天沙門年八十薙草開林表一小刹不下

山五十年自言此山無豺虎草木皆香西域寶
掌千歲僧也名此爲震旦國第一山四顧遙指
其近而倚者曰瓦屋羅回其遠而望者曰青城
玉壘其最見者曰雪山山隴經而火焰葱嶺與諸
蕃之界俱在縹緲其餘萬山真如培塿青衣洋
瀆三江縈然如匹練使余應接不暇少頃黶黷
雲布兩人復歸禪房有披髮道人衣樹皮不言
姓名坐風雪年餘余招之來杜口振手意在服
食咽氣與通天異有所託而逃焉者也長揖別
去余就枕越四日再登浮雲忽開太陽吐扶桑
和如豔陽步覩佛臺有小鳥如鸚鵡依人而來
鳴曰佛現佛現視之閃閃成暈青黃紅綠之色
圍繞數重初見若車輪旣而圓徑漸廣跨過山
足觀者如對鏡惟見己身雖竝立者不見人云
此普賢身也有鼯鼠亦來親人或言山有雲霞
氣日映之則光鳥鼠亦忘機者通天飯余禪榻
授余養身之秘坐更餘一僧報曰聖燈現矣疾
走現光臺始見其一如火漸至數百時隱時見

僧云往吹入殿中信手撥之一木葉耳理或有
焉余就枕越五日又登絕頂日大明如昨一僧
携放光石如水晶大者徑三四分就日照之成
五色如虹霓望七寶臺在深崖與通天別從故
道下山崇峰懸磴白雲護之渾如銀色世界樹
間啼猿小者如拳暮宿白水寺有妙境沙門自
西游還從師高僧荀峰歷五臺南海道場談之
津津有味越六日至黑水寺訪八音池每盛夏
有水人鼓掌則羣蛙鳴其起止俱先一蛙如金
聲玉振有白玉環採之光潤異常乃千年物豈
晉慧通慧持皆遠公高弟游此遺之耶暮宿老
寶樓有鑑燈沙門了大藏爲言蔭法雲則火宅
亦涼曜慧日則昏夜可曉儒釋異耶又愛詞翰
余檢家按察公見南江閣詩文選付焉壯哉司
馬遷之著作藏名山巖若平之九州游八也乃
佐理此山舍此山將何所藏哉鑑燈指龍門洞
三峨三峨諸勝莫能窮也大都廣圍千里高百
二十里余得其槃暮宿峨眉縣越八日王李二

君書來詢游狀余報曰茲山善畫者莫能圖也
果右軍之緣續太白之歌勉旃哉以五七言古
十四章絕句二章復焉越九日登瞻峨樓書作
記

陳子曰夾江毛潛賓檢討寄余峨山光景記及
余游而毛先生捐賓客彼稱道家虛陵洞天佛
家大光明山止耳至黃帝訪天真皇人于勝峰
中言君猶神也民猶血氣也民難養而易散氣
難保而易失吾道何加焉楚狂生以鳳衰譏尼
父茲山千仞哉宜有楚人之翔與

二西園文集卷之十

沔陽陳文燭玉叔著

記

大觀樓記

瓜洲蓋重鎮云其地邊大江積沙爲洲其形如
瓜自昔張官設驛 高皇帝曾乘巨艘憇焉
勅有司歲祭江海潮神祠至脩城備倭與揚州
府並峙自 肅皇帝三十六年城南有望江樓
久廢同知丘君如嵩脩復從民願也故事叅政

至鎮督運財兩三月耳萬曆七年文燭以巡漕御史奏留造舟上特旨允焉年餘而樓成太學生黃一正蕭周郡學生吳松輩率父老請余碑焉且曰荆南以王岳陽以范其以人重乎余竊悲二公遇殊而言異大都易地皆然也茲鎮當南北之衝而吳越之會也望鍾山而吞長江金焦北固種種在目朝暉夕陰風皞雨嘯海氣潮聲萬態難窮斯亦宇宙間之大觀哉潤州萬歲樓揚州文選樓楚州宴花樓徐州黃樓雖今

昔興廢而視此則隘矣然四州皆用武之地而此爲咽喉登斯樓也仰而防未然俯而戒不虞矣今聖天子在上湛恩汪濊封疆大臣揆文奮武有司祇承約束道不拾遺百姓安堵余尚懼末技游食之民未緣南畝積貯少而風俗侈卽有水旱胡以相恤卒然有師旅胡以餽之此昔人所凜凜也無事如張綱歐陽脩有事如謝安韓世忠威大造於揚其勲業與山川爭雄是在有位乎是在有位乎若棲遲故土之思如仲

宣先憂後樂之懷如希文斯賢豪登覽者所同
余無容喙矣遂題大觀樓而爲之記

逍遙樓記

往讀南華內篇質于家君子家君子曰漆園所
稱逍遙卽孔子之樂子思之自得孟子之不愧
不忤而已定內外之分辨榮辱之竟莊生非達
者耶後不佞遘小樓數椽登而嘆曰大哉九州
之內六合之外乎乃余藐焉中處矣然榆枋之
飛鸞鳩也蓬蒿之翔斥鷃也一枝之巢鷦鷯也
滿腹之飲偃鼠也焉往而不自適哉客有惠顏
魯公大書逍遙樓者不知在何許遂以名吾樓
而扁焉史稱清臣風節如嚴霜烈日書法如鐵
柱又平生所向慕并書以告我後之人登斯樓
者

江閣藏書記

家按察公讀書見南閣上謂小子曰汝知古人
乎漢武帝幸河東亡書三篋張安世識之唐太
宗巡行有司請載書以處安世南爲行秘書止之

王仲任過洛陽市見所賣書輒口誦遂著論篋藏逢世欲讀前漢丐親友刺尾紙手抄以漢書聞此恢奇多智其家豈有書耶若惠施之五車劉歆之七略班孟堅之九流李弘度之四部鄭康成之經神房暉遠之經庫李泰和之書麓皇士安之書淫杜預之左癖傅昭之學府張華之三十乘韋述之二萬卷數家者侔宛委而埒東西觀今吾所藏半焉乃所讀孰與古人多小子懋哉夫鄴侯之架在衡之陽二酉之藏在辰之陽楚書大較富也異代掌故倘求逸於沔之陽乎有大人著作在小子何望焉退而作藏書記詔我來世

甘露園記

往聞鄖子國東北隅有文杏古檜干雲凌霄其下則吉陽何先生讀書處也先生家食時甘露團團降古木遂名其園乃先生事肅皇帝朝官南京刑部右侍郎勲樹在江淮以講學風海內謂王文成良知之說得鄒魯之真傳而文章母

涵地負遠宗臨川近慕吾江偶見不穀之作擊
節賞之報書先大夫曰公有子而文乎嗣交仲
子仁仲先生業下世仲子才士先生不死矣屬
余園記且曰先生意也嗟乎姑射之飲丹丘之
獻僊掌之承豐草之零木蘭之陸往籍侈談之
顧先生爲時大儒也甘露蓋休徵哉仲子益以
名卉佐之奇石有堂曰卮言閣曰綠雲臺曰清
虛有竹葉居梅花屋翠隱洞芝廈其名勝莫能
殫述仲子又言世稱名園外構華整而主人中
不相關今余寓目皆所手植暇則詠歌優哉游
哉聊以卒歲昔仲長統愛廣宅背山臨流花木
周布息四體之役謝眺遊東田累榭菌閣魚戲
鳥散極四時之樂仲子公理其人玄暉其才乎
竊多其有古人之致云獨恨先生未及見仲子
之成如今日及不穀爲公家記也

勅書樓記

臣家有屢朝勅命誥命若干軸有勅諭制策若
干通建樓寶之恭題曰勅書樓大哉玉言如絲

如綸蓋先大夫之意且今來世榮華袞而篤忠
貞也有客登樓獻圖十二且曰金刹當軒玉虛
橫牖雪凝朱閣月掛荆樓此前景也旗纛五尋
學宮萬仞建興迎曙楚望連雲此後景也綠楊
煙雨翠竹亭臺東沼仁風西城夕照左右景也
吾子覽勝而樂焉不穀撫然曰文燭自乙丑事
肅皇帝官廷評十八年矣穆皇帝庚午以江淮
大溢遣戶部郎中賑饑時督臣議行海運用燭
守淮安今皇帝改元以輔臣言更儒臣筆書陶
鑄士林用燭董蜀學政丁丑黃河淤阻運事孔
艱遣大臣經畧用燭叅漕務三仕急矣至塞上
命而成先志負負無可言者登斯樓也馳北闕
而夢南山矣何樂爲客退而周覽四顧景光陸
離有如客言因憶昭明擅文選之著仲宣典故
士之懷希文多憂樂之感叔偉望駕鶴之賓其
樓張楚而四子異棕矣不穀有忠孝之思乎將
樂斯樓而老焉此聖主之恩也先大夫之遺也
書作樓記

墨花深處記

余建勅書樓尊制矣復扁先按察公示不肖諸
作于允宜堂西題曰墨花深處漢太丘長之子
紀謚晉索幼安之于緄唐蘇許國公之于頰稱
父子相知未有篇詠如先公者也先公有太極
硯一斧硯一手自珍贊因置其中而不肖時操
柔翰宛聞過庭之訓王言絲綸遺草金石願來
世竝珍之且作忠孝云

雪坡草堂記

郡城之東隅封崇爽塏者惟報恩寺寺西有地
屹然而峙每遇雪天林丘積素迥異它處人言
雪坡云去先按察公大業堂財步武耳不穀憇
焉避暑寺中間誦釋典氣茂三明情迢六入皆
清涼境也方遣數椽葺門圭竇而海內同志或
開府于鄂渚鄖西之間或秉憲于荆岳蘄黃之
澣分俸貺之助成厥盛因憶昔時有林君景思
者結廬天台傍曰雪巢而楊廷秀賦焉中言厭
人寰之喧卑薄市門之罽塵八窓夜明萬山失

碧巢成雪至雪與巢會式瑤我室式珠我廨俗
子標門懼點勝槩不穀有心前代揆之又諸公
誼至高亦楊子所稱霞外雲表矣嚴劍南遺草
堂之資于襄陽惠買山之錢寧獨一念微向古
人先之哉遂顏其堂爲雪坡而記之

芝英亭記

小子侍先公論字學公曰汝知芝英體乎小子
曰世稱歐陽詢有楷法張伯英爲草聖李斯入
篆室虞世南隸弋法也盛哉鑠乎名立後世公

曰漢時陳遵稱篆書之祖芝英蓋其體云每書
一出坐上皆驚人稱陳驚坐且六國爭戰潛爲
符信書各異體而芝英其一也乃秦煨滅之漢
武帝殿前產靈芝二本歌芝房之曲而述芝英
之書恨曼漉莫傳耳小子曰孟堅最善孟公所
稱愛客則投轄于井尺牘則人以爲珍使匈奴
則單于大奇之有列侯誤傳爲遵者坐中震動
旣至而非號曰驚坐或謂其談遠而書未見稱
也茲異聞也班史逸之何啻珍珠船耶後蘇阡

產芝數本先君草瑞芝賦小子請建芝英亭先
君笑曰汝異時自爲之偶新一亭因憶孟公高
妙先君博雅眇然千古矣遂記之而名其亭曰
芝英

長慶亭記

陳子得片石像五宗之峰而題焉北爲碧玉南
爲岫嶠東爲日觀西爲蓮花中爲太室平生浪
游之志半矣方思畢焉卧游神游適茲丘耳向
長禽慶吾其斯人之徒與扁其亭曰長慶

石山記

陳子園有山石諸君子所惠也蒼翠鱗集岡巒
龍襄與客登臨而狀焉有言帝臺若棋月林若
鏡雲岫如複松風如響者是古之奇也余嘆曰
無論徼外高嶠神州大塊卽名園中芥子耳因
憶平泉之醒石李德裕栗里之醉石陶淵明鬱林之
廉石陸績履道坊之盤石白居易海嶽菴之研石米芾
今何有也而五君德業文章磊磊磷磷在三丘
五宗間片石之名存于五壤非攻玉者耶余意

宅山矣

陳氏先塋記

吾陳世家江北其上門蓋義民公宅云墓在宅
之後其西近義民公者高年公墓也近高年公
者竹塢公墓也靜軒公墓在三角坑承德公墓
在蘇阡有勅贈坊子孫自義民公出者幾百人
世以科第顯彬彬盛矣其彥昇公之墓傳葬下
門今獨中順公墓在耳且義民公墓東纍纍數
十塚豈仲明公而下多在上門乎俱不可考矣

往小子修譜時曾詢中議公裔歛良久中議公
下世小子拓祖居而新之東闢神道濶一丈深
三十餘丈以達塋所往祭掃時披荆棘出入他
道又牧童採樵其上中議公與諸父諸兄弟築
墻而垣之小子捐俸金百兩建一石坊題曰陳
氏先塋蓋中議公之意也夫古者不封不樹過
墓則式去國哭墓而後行滕公顯白日之銘揚
震立大鳥之象曹氏開阡于京兆淮陰旁置乎
萬家中古以還重丘墓若此陳爲文獻世家尚

不盡識其先世之藏也它何以責焉余懼後之
視今猶今之視昔也記而表著焉韓魏公有言
謹家譜而不忘先塋孝之至也吾日有望於後
之賢者

玉沙草堂記

江北古城昔時玉沙縣也水經有白沙水自江
口入沔湧玉泉在城之北憲使柯公喬嘗登古
城詢父老以泉莫得也乃城濠即泉地乎余改
爲湧玉陂而結廬于古城之內且地號上門東

號下門吾陳世家焉永樂間鄉進士平博士父
子所居先中順公時遊焉嘉靖間屬之翰林學
士童公先中議公時遊焉崇岡峻嶺茂林修竹
蓋郡城之孤秀也萬曆間屬之小子無論二氏
之亭榭鞠爲荒草即崇者卑峻者夷茂修者剪
矣小子易數家地拓而爲園且復古路中榜其
堂曰讀書館曰懷陸閣曰溪山深秀亭曰翛然
各有小記後爲亭者二左仍平之亭曰翠雨董
述夫書右仍童之亭曰素獻張伯起書亦以四

五公之風猷尚在山岫六曲之間也或謂園秀而野品而確永有傳乎余咲曰茲地堵而雉雉而城城而阡陌天地山川有易也而况園乎昔人等園爲主而主者客也即有之千百年間視二氏俱客耳而况名乎吾爲吾園而已題爲玉沙草堂而記之

環玉亭記

往入蜀過鹽亭宋文學士與可故里也夜夢一老僧持萬竿圖示余曰此文公直筆也余覽之蒼翠濕衣老僧曰願公一詩易之余愧遂良久老僧曰公名異代高與可矣覺而夢乎有是哉余補官南歸復有西蜀之命從子汝陞建環玉亭于塢上余坐之宛如夢中所見善繪者莫能圖也因謂從子曰君子比德于玉而知竹之同于玉乎玉之溫潤而澤是含風帶雨者玉之縝密以粟是負雪栖霞者太液之叢生廉而不穢也嬋娟之蔭修垂之如墜也嶰谷之管遷亭之籥其叩之清以越乎化而爲龍變而爲蛇其瑕

瑜不相掩乎故武公之德子猷之詠中散之賢
太白之逸何嘗不賴此君而自玉哉亭名環玉
蓋有砥礪之助云從子起謝曰君子貴玉而賤
珉祇哉象德明訓遠矣請書之以誨來世因憶
丹淵有文行于世余何敢望其萬一乃老僧談
真夢中語耳附載之以俟賞音之士

考槃草堂記

此義民公故居也天順間輸粟賑饑荷明旨旌
焉公富而好施名與兄中順公竝別號考槃家

江北上門其子高年公生竹塢靜菴承德三公
蓋地靈云正德間兄弟徙下門又中順公故居
也二公墳墓各在故居之後嘉靖間按察公同
小子徙復中光祿兄仍下門隆慶間小子闢草
堂而新焉夫公一布衣優游江漢在澗而寬
在阿而適在陸而軸詩言考槃樂可知也且士
生一世取衣食裁足乘下澤車御款段馬守墳
墓鄉里稱善人足矣馬少游言爲我乎而公隱
德昌後可當碩人之詠題曰考槃草堂并告吾

陳氏之世守者

碑

沔陽州脩學碑

學宮在郡城東北之中環水而城岷之江嶓之漢逶迤千里會焉休風顥氣代鍾名哲記脩學者
者在成化則黎文僖公正德則魯文恪公嘉靖則傅司徒公詳哉其言之也後袁公福徵請記于先按察公而不果文也萬曆八年郡守史公奉命蒞沔顧瞻廟貌有傾圮者明年政通人

和蠲吉興事州判朱君耀承委勤力慮材鳩傭各捐俸助之自禮殿兩廡戟門櫺星門敬一亭名宦鄉賢詞以至牲庖齋所廩庫泮池煥然芥藻七閱月而繕完公率諸生告成事觀者如堵不佞謂魯人歌泮水以頌僖公漢時觀橋門者以萬計千載而下且暮遇也史公興學蓋循吏云學正徐君應宿訓導呂君蒞王君冲命諸生劉完陳宗器輩謁不佞碑焉憶侍先按察公論學公曰二三子知孔門之學乎當時農山之遊

閒居之待于山則曰勇也士乎憤憤者乎于賜則曰辨哉士乎仙仙者乎于回則曰美哉德乎姚姚者乎于參則曰道以明德德以尊道可語王道乎它如金人之銘欹器之說嬰圃之射蜡賓之與慎言持滿志三代之英乎顏子沒而曾子唯一貫矣曾子沒而孟子承三聖矣彼稱江漢以濯之秋陽以暴之皜皜乎不可尚也吾友謙之謂其直指本體所唯不虛即賢于堯舜之贊堯舜未易賢也麒麟于走獸鳳凰于飛鳥不

幾于絕德乎禮樂之等最爲近之奈何求諸聞見也後世談日衆而道日晦不過子羽之容宰我之辭桓文之事管晏之功止耳下則鄉原之媚左丘明之所耻也洗心者非乎語曰丹之所藏者赤漆之所藏者黑君子慎所處者焉二三子生長江漢處學宮矣脩學者尚飾以丹漆而乃無洗濯之功如藏脩何不佞跪而受命終身誦焉謙之者鄒東廓先生也良知之學得諸陽明王先生沿濂洛關閩而達洙泗者紹聞德言

告我同志倡明正學以光山澤庶無負郡守公
之教哉江之永矣不可方思漢之廣矣不可詠
思郡守公之謂也公名自上浙江餘姚人

重修黃蓬山靈福觀碑

沔古竟陵地東南一山曰黃蓬去州二百里岡
阜隱見若瓜蔓其峯三百餘江漢之靈延綿環
結蓋福地云山間有觀名曰靈福不知創自何
代觀鐵鑪古篆其在周秦乎郡人檢討劉公琢
賦十二景其子進士公深作脩觀文以十二詩

刻于碑之陰先中議公思與小子同遊一詠其
槩以續劉氏父子之盛乃中議公竟不果也今
小子卜石靈山庄始一至之吾友劉君完李君
孟時携酒以從登後古城時天甚暑觀有古井
水寒而斗汲之可坐心消渴覽其殿宇霞駭雲
蔚李君曰此吾先處士某所脩虛石以待名筆
劉君曰願子一言以配先公余高兩君之誼安
敢以不文辭余聞海上三山蓋有蓬萊方丈瀛
洲而姑射之中蒙穀之上多金銀宮闕其間羽

衣黃冠御風飲露乘雲而龍光日月而載星辰者何限乎茲觀視之真太倉一粒耳然道之用流宇宙猶血脉之貫指擘也廣成子所談柱下史所論河上公所著鴻寶萬畢所錄咸云至道之精窈窕冥冥昏默無勞汝形無搖汝精無視無聽玄之又玄大都與吾儒之靜佛氏之空有同歸焉夫脩潔而飾者慕道之象也抱神而一者守道之真也余嘉李處士新其象而欲閭巷之人脩其真也故與二君言之頗詳若夫丹竈石髓金膏玉液練色蟬脫稱長生不老則余敢盡知哉道士聞余言請書諸石碑上劉公之詩文處士之一念與茲山竝永也哉

重脩黃蓬山崇鳴寺碑


黃蓬有崇鳴古寺與靈福觀竝吾友李子孟時以禱嗣應脩觀音閣屬余爲記蓋谷神休云後余游山寺問前代碑無有也門人王子之翼立墓在茲山去寺里許王子嘗廬墓請曰李子願得先生言以鎮茲山可乎陳子登香山周覽四


顧見大江自岷峨而下六泅數千里又隔江羣
峯灩澦其駭駭者赤壁山乃周公瑾破曹處蘇
長公以黃州當之古稱戰場非耶即友諒漁子
弄兵湖上至歸真主驅爵之鷓驅魚之獺耳然
王圖伯各方蒙矢石橫草之功一敗塗地今蕭
寺獨存豈淨土樂界若存若亡不生不滅與江
山爭勝耶故行不捨之檀而施羣有矣唱無緣
之慈而澤萬物矣演勿照之明而鑒沙界矣導
知機之權而濟塵劫矣正法既沒象教始倡而
頽壞莫振則三十七品胡以內之九十六種胡
以外之李子新象教而振法門諸僧飛錫耶掛
錫耶諸僧曰吾皆住而非行游者余聞戒定與
慧無分行住因聲而晤因緣而覺何莫非教耶
諸僧羅_拜謝曰公言苦海慈航昏衢巨燭矣李
王二子撫然曰此吾黨所當知寧獨誨登彼岸
哉遂勒石爲山寺記

西園文集

卷三十一

六





原件短缺

卷11-14

